

A donnetta de caréghe

da a spinn-a sottî, p.21

Co-a testa ascosa sott'a-a so veletta
vestîa de néigro a ven da-a sagrestia
e destegando quarche avemaria
a se segna con l'ægua benedetta;

a leva o mocco a quarche candeietta
a reméscia e caréghe fîa pe fîa,
a n'azzunze, a ne leva, a ne regìa,
baxâ da-o sô ch'ò l'intra da-a lunetta;

o Cristo, ch'ò sta in cröxe in sce l'artâ,
o risponde a-o pregâ con un sorriso
e o ghe confia che – quande in Paradiso
o Sò Paddre Celeste o se a piggiâ –

pe l'eterno riposo da donnetta
in Çê ghe saiâ za 'na careghetta.

Da no scordâ o seu

Paddre Nostro

nei Vangeli
raccolto in rima in un'ottava

Paddre nostro celeste, Nomme santo,
manda o Tò regno: e tutta a Tò voentâ
a segge fæta chi, comme âtretanto
a se fa in Çê. E drento casa mæ
no manche o pan. Se mi Te devo un tanto
cancella tutto, ché verso mæ fræ
mi faiö pægio. E scori a tentaçion
che mi fasse do mâ ne l'ocaxon.

O poeta Patron o l'â mostròu 'na sensibilitæ da faghe
cheugge scinn-a e cöse ciù picinn-e, che vegnan monti
quande lê o ne e fa scrovî. Comme inte questa conpo-
xiçion: curta ma beliscima.

A chinn-a

da veddri appannæ, p.23

Se ti l'ammlî con euggio indifferente
a te pâ solo un cavagnin guernio.

ma se o tò dio
o te vegne acciappòu da 'na magninn-a
o cheu o te o spiega cös'a l'é 'na chinn-a.



E coscì, comm'ò n'â contòu da vitta ch'a nasce, o ne
conta anche da seu fin, co-a seguessa che a speranza a
no meue mai. Da bon poæ, o parla inte questo mòddo
a-o figgio ma, in veitæ, a tutti niatri.

L'urtimo portou

da veddri appannæ, p. 54

T'è l'urtimo di ommi da famiggia
che ti camalli o nomme.

Pòrtilo comme
se porta o Cristo néigro in procesciòn:
comme un bullo portòu fallo ballâ
anche se a stradda a se ne va in montâ:
fanni luxî i argenti comme spegi
in ta luxe do sò: regola i passi
segondo o péiso a l'uso di tò vegi.

Scin che porriö
faiö da stramuòu sepre a-o tò fianco,
ma fito saiö stanco
e alloa ti te n'andiæ
da solo co' o tò càrego pe-a stradda
ch'a porta in Gexa.

Davanti a quell'artâ
mì t'aspètiö in silensio.

O Patron o voeiva tanto ben a Zena. O s'é indignòu
quande l'òmmo o l'â destruto a Via Maddre de Dio: o
s'acapisce da-a fòrsa ch'ò ghe mette inte sta poexia: mi
ò de longo aprexòu a potensa co-a quæ a l'incomensa.

Aviéi criòu

da a-o borgo chinn-o – p. 25

Aviéi criòu. Ma chi v'aviâ sentio
vège case de Via Maddre de Dio?

Ciù de dexe paranchi
a scaregâ frecciamme;
o 'na cascata
de un tonnëo de carbon
drent'a 'na stiva;
o un magnan
e poi 'n ätro e çento ancon
a piccâ martellæ...

...ben! l'é pëzo o bordello
che ancheu fân i dinae.

E intanto aviéi criòu
pe ogni vostra ferîa,
ma quella vostra voxe
ben pochi l'han sentia.